

朱九江先生集

朱九江先生集卷五

詩

贈馮四 州新 復試京闈

雨餘海光闊載酒送遠離離多疲怨心那復歧路悲子旣無營
魂余亦拙言辭底須折柳歌而亂人意爲低昂江上舟飄裏舟
上旗且盡手中杯去矣如發機甯知居者腸迴轉車輪馳振觸
平生事心目來依依喉吻棘芒刺吐卻理亦宜兩生總角交膠
漆謂遜之子才明光玉表裏無磷緇言當設九賓席上呈葦蕤
高歌眼中人此世舍汝誰身事有反覆天平安可知風帆入大
海一發收何時一歲折將離一歲寄當歸自此波面萍各賦長
相思相思厭離合十有二年茲失作重負壓輒用炫憐變長風

送天衢今當一鳴飛一鳴豈不慰至竟悲無涯容華閱塵土未
老潛凋虧昔爲朝華妍今作秋陽萎酒紅辭面顏霜縞尋鬢髭
還家拂不去其白猶差差里嫗不敢認道是誰家兒是時鵲回
首怕汝涕兩頤差喜北堂護留及春風吹堂前荆樹林窈窕華
其枝閉戶盎然足遂樂南山飢以茲強人意去去從此辭杜陵
遺贈言更當慎其儀客途有明月遠逐征鞭揮故人指月輪迢
迢溯心期

感事與馮六

汝棠

孝廉陳九

信民

大令夜話大令抵足同

寢卽追懷尊甫心農先生二首

數百容公輩其如扞網終敗羣恐害馬亂視惱飛蟲事以心平
定機先目聽聰不文嗤絳灌黨論本來空

舊日梅花帳丰裁故不高里豪歸拊背海盜失如毛州邑尊王
烈宗風續孔褒摸牀同不寐聽徹曉雞號

山閣夜

集樹昏鴉定松門夜已分波光涼似月人意嬾於雲衣鏡窺來
悟瓶笙靜裏聞叩關誰剝啄或有訪論文

丁酉九月十八日廣州歸村泊甘竹西岸

利涉吾何有戢船感不勝海風搖噩夢潮氣入昏燈浪作鮫人
泣終憐龍斷登師峯迎面立對酒兩岐嶺

北邙山行

北邙山顛松柏桐坐閱人代生悲風華表荒荒日將落牧童敲
火牛礪角宰木爲薪事猶可昨日豐碑今柱礎誰家發引從如

雲輶車會葬來千人此千人者衣冠素丹旒厥旌照衢路金銙
不熱三泉寒塵世變滅隨風煙石人不語語應淚眼見官人卜
穴去

送屠使君還楚中

使君子身需次
來粵近復悼亡

送暑迎涼過雨天歸風剝剝促行鞭自君之出踰三歲此別無
家又一年駟牡倦遊長路半孤雄尋夢故巢邊漢南試問親栽
柳如此長條已泫然

陳九明府走書借讀二樵山人集卻題

一盞寒泉供養來楚騷餘裔亦仙才

我師昌谷頗能仙
集中句前身合是梅

花骨流水空山獨立開

南漢宮詞倣李義山隋宮

紅雲宴罷火城回丹藥方嚴水殿開五色羊珠收寶去四門魚
鑰斂錢來朝中卮酒恩猶渥海上樓船事可哀豈獨花田弔陳
跡鷓鴣飛徧越王臺

憫潦詩呈愛之次卿兩孝廉四首

連宵發奇凍中人毛髮灑預憂水氣盛西潦驚里社數日聞訛
言滿耳雜侈哆忽傳高漲及鈴峽三丈瀉倒屣往視之駭目汗
盈把激盪風雷鳴渾濁天日赭古潭眾窰戶滅沒出寸瓦一漲
三日期一日百憂寫幾時誓安瀾刑牲斬白馬

急流旣呼洶長風復蕭颯大隄如堅城浮脆同藉毛延緣一綫
泥障壅千丈壽是時萬家命呼吸人鬼交鵠鷗爾何物白日聲
鳴騎得無鬼伯使作此絕命妖野人聽其聲一寸魂搖搖有飯

不暇炊有機不得縑重憶癸巳歲淚落連珠拋

中夜鼓柝來告急踵相貫既潰曲爭頭名磯又報河清岸賢哉兩

孝廉吉凶與同患肩輿弗及待僵走泥至哥武力來什伯椿埽
亦億萬一夫抱其根投沒奔湍半一夫拯其頂飛空奮椎健剽
疾過竿戲勢上切雲漢舂搗各就理出險發深歎覆巢與完卵
其閒不以寸去時五更霜歸時二更飯

壤地各有疆護助亦有盟吁惟此邦人真不可與明不自有其
土樂禍如佳兵費我借箸籌曾無簞犒情是地豈閒田虞芮兩
勿爭不爭事猶可不救瘡痍成三五垂白叟叩頭厥角崩藉非
明公惠百室魚頭生揮手謝父老我亦識字氓肉食從古爾請
勉秋稼耕

象山社緣麓行至鬱水上沙溪乃反夜已嚮殘

水國森夜涼明河落華句羣動淒已寂萬象悄彌憐村春晚凌
厲戍火寒隱見行野忻有適發興乃忘倦高厓石切額迴溪路
彎纔仰登屢踈局俯遠仁蟲緣浦激漁家艇松根網絲罾趁樹
約鄰多吹葍行汲便晚食瓦盤酒兒女雜嗔怵世態苦喧卑此
樂讓汝先席草接輦語月破川浮練落葉散魚背清霜厲人面
更永不可留回蹤磔幽眷

門人老上舍

鶴年

送酒二首

初日上檐聞鵲喜開函起舞動比鄰便思說劍邀豪士大好攤
書對古人蘿月涼添江上夢花枝紅入鏡中春卽看臭味從同
處交道文章信有神

平生快意說堯鍾荏苒中年百慮空世態漸飛言似雨

易林尊空无酒

飛言似雨權場銷盡氣如虹灑沈力困華離國珮璫人憐大小東最

擬中山千日醉鳴磬四野正哀鴻

諸子同遊海目山還舟沙口關四兄弟留燕作詩

僂身出風檐去去不留行從容理襟帶洗面塵一升始覺天宇
高又見星日晶交親喜我歸提挈觴榼盈餽餽雜軒轅進辱償
退榮三子益標勝把臂山水程入耳顏忸怩我曩何所營得無
巖隴笑亦教猿鶴憎誨我達者言合軌匪逕庭古有占利涉亦
有不字貞鳥還與雲出雨雨無虧成促袖出青蚨買舟千丈泓
如浮博望查去問牛斗星隔波望松翠頓豁雙眼明兩崖如斷
玦後者窪以平緩路達前崖漸漸生圭稜前崖兀然高回顧若

有情平吸萬里江削立一點青終古流不去永屹滄洲城崖趾
穴龍淵牙角實峻峭難測支祁鎖屢通雷電靈至今鼓角夜髣
髴疑出聽緣崖徑寸樹盡作蟠虬形尚想區中允有誓留元局
明區用孺先生大相愛其地謀歸老焉集名海目以此鶴路失退飛山價亦已增君正健
腰腳我又老笠簦曷不此誅茆來結江面亭海風中人猛五兩
難久停回頭數行蹟步步鐫心銘重邀主人惠一過饑腸鳴沈
飲自展放談諧四坐傾昨者何局束蚓竅鳴蒼蠅今茲何勇銳
膽犯蛟龍腥乃知人一生位置非有恆譬彼手鏡照愠喜本自
呈先迷不可諫後得庶有徵行編海目集兼訂酈元經

宿鄭中書

景祚

西郭書莊

柳絲容裔碧波紋繫榜撾門犬吠雲詩做柴桑陶處士人呼齋

茶盃嘗君秋蟬翳樹風初定老牀眠花日欲曛慚愧鄭莊頻置
驛賦閒堂上息勞筋

何兵部文枉過寓齋言懷有述

望見須眉一灑然得從冠蓋儼神仙追權我憶重三節好士公
如六一賢神物久慚金躍冶名山敢怨玉生煙五湖三畝皆臣
志恨少貧家負郭田

借居正覺寺蘭若雜詠十四首

松逕

一行松吹中百體共淒警羨爾鶴巢安罡風吹不醒

榕社

不見象山人空餘象山社合抱榕蔽牛曾識吟詩者

前明黃觀
察應秀岑

司馬昌運等及先叔祖烈愍公結
社於此陳文忠子壯亦時與會

月臺

滅睡立文階偃來石闌滑不爲秋夜涼惜此故山月

山塘

夾湖松濤瀉方塘一鑑明勿爲泉水出終保在山清

藏碑亭

柴桷未崩摧汗萊何塞澀披莎展殘碑野鼠作人立

南國祇園

西士來南國聞根兩不居菩提本無樹何處覓精廬

佛堂

帝釋只垂手修羅徒奮兵詩家自在慧吾服古先生

讀書齋

水國愁潮蒸山居信埏爽開函索蠹魚初旭照書幌

西閣

拾級孤響騰鉤簾遠原集日落未落時隱見征帆急

南窗

對宇桃源里推窗雲樹涼但能忘魏晉白日到羲皇

用杜句

藕花池

風林纖月墜煙靄浩茫茫童子奉簾入微聞風露香

香積廚

僧去灑葷腥我來潔粢白儒墨兩可忘也共真一酒

霏鞋室

誰抱冰絲絃倚蘭調重按美人遲不來彈出瀟湘怨

山靜堂閒處

悄悄無人語平檐日未西晝長煙縷直時有竹雞啼

與廷光小飲懷馮四北行未還卽事四首

斐几團欒對松堂笑語新子諒人似玉澂醴酒如春事去謀生
拙心閒得句真杖藜能數過筋詠不知貧

歲晏寒淒緊庭空夜渺漫有人當短至罷酒憶長安白日中原
盡青山一髮看離亭舊楊柳搖落角聲殘

秋風動關塞之子悵何依已閱炎涼候應隨鴻雁歸新霜凋旅
鬢落葉滿征衣晚臥滄江者憐君一累歛

翳盡初三月霑衣細雨塵梅花村僻路竹炬夜歸人故舊多行

笈平生一岸巾回頭山院閉煙樹鬱嶙峋

晚出歸山館有作

掩關歲云莫迺息輪鞅聒夕陰藹已繁放歌出叢樾冒徑饑飢
竄投林蒼鶻沒松涼落衣襦灑潤及膚髮何必入山深芳華無
時竭古贇一矢遠淳泓乳湏活傳聞老頭陀布金搜井渫闕此
甘露門眾生飮瓶鉢至今風雨昏僧眞見泉穴事往陵谷遷緣
來香火結我出尋素交歸步夜光闊慮澹追古懽趣超得新悅
久立寒杵沈西指街山月

桃源井事見
九江鄉志

小除夜書懷四首

大高醉後欲橫參人事侵尋感不禁名士本來如畫餅窮交從
古重分金一鐙促席殘年飯孤枕空山此夜心息盡塵機飯淨

土明春相憶薜蘿深

不及高柔少宦情紛爭雞鶩太營營拈毫我自無中壘擁鼻人
多倣洛生蘇季陰符成底事孫宏經術各知名翻身且詣和神
國料理觥船待麴卿

平原歎逝賦何多短夢輕塵跡漸磨感舊情懷如中酒遣愁詩
句比降魔門前風日都無賴眼底山邱喚奈何莫使流離怨充
耳東來長葛恐聞歌

巖栖此夕稱閒身誰憶平生漫浪人青鳥不歸前日使蒼龍空
轉隔年春唐花欲放先容折魯酒能賒且未貧差勝爾時逢臘
尾雁行債客惱比鄰

張大學饋歲有水仙花普洱茶二種詩屬諸子和

水仙花用黃山谷詩韻

一錢取看鴉頭黻腸斷千秋馬嵬月何如招得洛川魂賦就微
波歎情絕清泉手淪煩傾城膽餅襪帖參梅兄湘簾不開水沈
暖修眉淡對遠山橫

普洱茶用水仙花詩韻

鄧林狂夫腳不韉渴日急如牛喘月癡魂忽落天西頭矢與眾
生解煩絕誰因吟壘兼愁城探囊欲致愁方兄海雲墮砌春風
笑穩待今宵斗柄橫

塵沙行 德州苦水鋪作

北行之苦莫如熱北行之熱與南別熱惱酷矣塵擁人眼耳牙
須喉鼻舌乘竅而入達肺肝欲吐不能類癥結此塵乃若煙非

煙潮所從來不忍說牛溲馬矢委路孺攪入灰土吹平田輪蹠
日日蹴成屑乾風一簸腥聞天炎天不雨地欲赤輿夫汗垢膠
如涎和塵一揮落焦土雜蔥蒜臭爲臊羶車中屏氣不敢息擁
鼻分作僵蠶眠日光灼灼眼火鑠渴望赫景低虞淵千辛萬苦
厯站徧投肆日昃期息肩覆面積埃厚一寸茶鏞飯甑皆平填
舉甌吹沫勉一呷黃沙礪齒聲鏗然槃盂渾濁匕箸怯翻思家
食安鬻鱸仰面青冥向天訴何當夜雨鳴潺湲謂天蓋高聞不
徹得聞天亦厭其聒意東而東西而西且聽行人自回轍古來
回轍知幾人可憐滾滾塵隨身百千萬億恆河數一綫蟻逐窮
昏晨八紘砥矢歸皇極暑不停趨寒不息大賈營貲士策名下
吏高官各于役故人下澤愁且吁栖栖謂我何爲與有田可耕

館可假何因蕩析長離居未能免俗我亦恥宦情何日銷塵滓
北窗高臥羲皇人此際黑甜酣未起

良鄉題壁

憧憧塵躅幾時刪葺店蘆溝十往還贏得泥沙添面頰年年馬
上看西山

朱九江先生集卷五終

再傳弟子校桀於讀書草堂

代兆撫軍請襄陵臨汾水田毋照東南升科摺

謹案摺業今未覓得

甯待補業其未覓得而待補者又有檄西山神驅狼文

晉聯閣隴禦賊三難五易十可守人可征奏記兆氏功

臣三世家傳黃木灣觀海詩今特

錄摺題者舉所尊以見其餘也

擬請復漢儒盧植從祀摺

奏爲漢儒功存聖籍道備人倫請

旨准復從祀以光

大典恭摺仰祈

聖鑒事竊聞禮有五經蓋注疏之功大士有百行惟忠孝之道
光尋墜緒愈景遺徽表人彝斯隆祀典伏攷漢儒盧植涿郡涿
縣人剛毅有大節與鄭康成同師撰尚書章句三禮解詁而所
注禮記與鄭注並行後代謹按禮記一書爲羣經總匯其間兼
言三代之制不無純駁之分而後儒立解大約推尋義理則易
考釋名物則難惟後漢鄭康成盧植二人得師說於不傳之餘
深文奧解迴絕扳躋誠經學之大師聖門之宗子也有唐貞觀

二十一年增定孔廟從祀二十二人植與康成實在其列當時
敕撰五經正義前儒傳注何啻百家諸臣攷訂異同至詳至晰
從祀之典獨取此二十二人亦可謂是非之公矣代厯千年未
之有改至明嘉靖九年從輔臣張璁之議以盧植鄭康成學未
顯著改祀於鄉我

朝崇重經學雍正二年

世宗憲皇帝詔復鄭康成從祀迨乾隆中儒臣杭世駿著議請
復植祀與康成一體議未果上士論惜之夫植書今雖不存據
鄭志答吳模云注記時執就盧君則康成注禮亦嘗就問於植
矣孔穎達唐代通儒其撰正義自蕭望之許慎賀循而外南北
諸儒若庾蔚賀瑒皇甫侃熊安生諸人莫不挾其疵謬疏其結

禮而禮記疏中所根據於植者凡二十九條皆與康成顯然爲異而不敢少加評駁至詩疏續漢書禮儀志注通典諸書均多援引植注而有宋朱子亦亟稱之則植之於禮純矣粹矣焉得以學未顯著少之也夫康成閉戶釋經其節概在逃何進之辟避董卓之徵而植當漢祚式微中人構禍抽白刃嚴閣之下追幼主河津之閒造次必於忠義爲東漢宗臣第一豈乎卓議廢立楊彪袁隗之徒皆喬木世臣坐而結舌植獨抗論不同觚觔兕觥僅以人望獲免此非服膺聖教博習經訓能若是其見危不奪乎是故荀爽推九家之易愼墨而就三公蔡邕正七經之文依倂而參末議未有若植之勁節彪炳熠燿史冊者也推其經術則如彼條其行誼又如此當復從祀似無可疑查自咸豐

同治以來漢儒毛亨宋儒陸秀夫明儒方孝孺等或以傳經或以仗節先後列入從祀況植專家之學足範千秋徇國之誠亦風百世所謂隆禮由禮經師人師切應請

旨准復從祀以光

大典於以還千載崇德報功之舊於以正前朝懷私變古之愆風聲所樹士類奮興使天下儒紳之徒皆知遺經之可尋大節之當立矣所有請復漢儒從祀緣由繕摺陳明伏乞

皇太后

皇上聖鑒

敕部詳議施行謹

奏

論馬加利事

案馬加利之事何難答之應云差官命吏中途遇寇之事中國向來恆有滇撫鄧爾恆入覲爲盜所害咸豐初事也江督馬新貽閱操爲賊所刺同治初事也當時不過命該省查辦必責以罪人斯得而已馬加利於雲南緬甸交界處所勘實非雲南地突爲山苗戕殺

朝廷震怒不特嚴飭該省督撫急辦且特命湖督李瀚章馳往嚴詰眞兇盡法懲治以慰馬加利等枉死幽魂此正

朝廷壹視同仁視英使過於已使處亦足見我

皇太后

皇上至仁大公不以遠近異心也假如英國境內或有此事試

問舍戢盜正誅更有何法乎云云果如此說彼雖化外蠻頑亦復何辭以應□情無厭得寸入尺我旣輒弱如此彼之要求將來何可復問易所謂自我致戎又誰咎也

見所索七款中之第一款欲由紫禁城出

入一條尤
堪髮指

論派員往英事

派員往英之事何辱國至此□□可謂無人□□身繫安危先
自屈辱損中國之威長□□之氣天下何望矣回憶咸豐之事
喋血郊園盟於城下

乘輿出遜

晏駕不還公羊所謂百世之讐無時焉而可與通也今重有此
大辱之事此志義之士所以言念國恥當食而歎中夜憤排誓
心長往終已不顧者也

格物說跋

格物說三篇定古經之正詮屏羣言之底滯匡謬正俗辨僞得真使程朱確詰復明天壤泰山可移此案不動矣中明陽明王氏倡致良知之說不求諸事而求諸心由是心學盛興波蕩天下三四百年餘風未殄可謂烈矣謹案漢書注良實也孟子良能良知不過與良貴之良同義本無深解不聞以此爲七篇宗旨也况摘去良能專稱良知謂千古聖賢傳心之秘在是庠大約王氏言吾人爲學不資外求良知之體皦如明鏡妍蚩之來隨物見形而明鏡曾無留染無所住以生其心佛氏曾有是言未爲失也明鏡之應一照皆真是生其心處妍者妍蚩者蚩一過而不留卽無所住處其平日論學指歸往往如是然試問良

知作此解說果有當於孟子論孩提愛親之仁否蕭梁之世達
摩西來始厭棄經梵直指本心不立文字陽明祖述其說並稱
佛氏之言亦不之諱欲使儒釋相附害道甚矣此說中篇歷剖
心學之誤條辨如稼書桴亭而出以名通證明如清瀾北海而
去其矯激儒者有用之言所謂闢道樹教縣日月而不刊者也

澹泊齋記

果堂衙齋顏以澹泊二字蓋取諸葛武侯誠子書澹泊明志之語或曰志儉也或曰漢人喜黃老武侯之云殆亦無爲無欲之旨是故取之也次琦曰非也嗜欲之熏心如水之浸種萌動坻湍致無窮已不自抑制則起居服食聲色玩好之緣雜然而至於是黃緣機巧果其貪營而肆其求取其在內也干國之紀而恣睢其在外也形民之力而醉飽而惡可至於滔天故自來名臣德行建豎不必一途要無不本於澹泊者謝太傅功高百辟心在一邱范希文斷齋畫鷁先憂後樂王伯安日與門生對食孫高陽飯麤糲忍饑勞至於我

朝圖文襄之啜豆屑粥一盂湯文正之莅江南未嘗食雞臠張

文貞之白果數枚山藥三數片高文良之紙帳蘆簾卻掃一室
終日若無人皆此志也吾聞果堂秩滿朝

京師公子友有饋食者值錢萬君不擇曰饋食費萬錢禮食當
何如觀若材地故出彼人上平昔相餉饋亦有踰此者乎我家
餉饋若此進而郎署而卿貳而宰執宗藩何以行禮乎公子懼
然領訓退兄子某官某部堂主事衣弋綈謁君袂袵且敝矣君
詰之曰若居要地接要人願被服如此安之乎將以爲名也兄
子跪謝曰非敢然也兒旦旦趨公無暇晷偶忘焉耳君則大喜
曰是吾志也賚袍袿一襲嗚呼觀君之庭誥可以知君矣抑昔
人有言聞人譽之以卿相則喜必非喜其鞠躬盡瘁可知也嗚
呼果堂其同此感也哉

朱九江先生集卷六終

再傳弟子校栞於讀書草堂

朱九江先生集卷七

文

寄馮孝廉爲陳九籌卹書

愛之足下舟車無恙邇者陳九梅坪悲於臘月丙午遘疾越七日癸丑溘隨運往身後無子寡妻弱女慘慟鳴號近識遠交異聲同歎至乃里父村僮竈姬走卒亦用惘然昔一國輟音春者解哀五穀百身可贖詩人以痛三良以古方今伊其信矣吾兄儻亦有聞而心惻者邪乃者總帷虛掩四壁風颭食蓼捋荼不言而喻竊意渠同年世舊官京朝赴上計者咸萃都下得否會知賄賄遲速叨收嗟乎東里西華有後遜任君之効素車白馬舉喪遲范叔之來

北行抵清遠縣與季弟宜城書

五弟無恙征舸旣邁遠逾十晨願言之懷昔人所喟愛而不見如何如何吾弟內娛諉背外隆德聲雖曾與齧指而動操召南樵山而振稱絜其勤勞無以喻之也鼎束裝後待友佛山鎮雨日迺得成行舟師謳擢汎若鳬鷖游子寄音眇望魚雁是夜宵半衝風驟激頽波彌厲元雲靄空夙夕不解雨雪告零先集爲霰曙發盧包之汎莫宿黃巢之磯嚴霜隕而葭菼淒元冥深而若英晏鼃頸之灘迷茫乎津逮龜手之藥歎惻乎水工行路之難諗我端倪矣家累凡百弟克當之同踞舊鄉心魂慰藉惟吾弟續昏一事軫結未忘上有黃髮罷勞晨夜下有雛稚噢咻嗟笑茲事之亟豈煩觚縷願鄉土是諮亦云省便而此邦之人內

教隨壞習錮旣久庸計門戶宛宛處子或有季蘭之好悠悠靡
俗恐入齊咻之教天下多美何必是求權輿弗戒後懊焉集行
子過計是用悽悽風水蹇逆行郵遂淹以今二十七日到清遠
縣兄弟健好餐飯猶昔謙多徒侶解誨憂虞詰誠家人勿我爲
念從茲渡嶺浮汭西下楚歌千些湘波萬重背湖涉江釋舟趣
陸更復馬首斷雲千里隨夢雁足飛雪崇朝灑襟七聖皆迷之
野惘惘而驅車耦耕不輟之鄉栖栖而問道山川合沓息影何
時靜言思之百憂集矣夫人情迹接則多忘景逝則恆憶歲華
不居游讌未極往時家衞羣從如龍齋居盤盤言笑晏晏東方
未明已對牀相語西柄之揭猶露坐未眠論難紛起聲與百舌
競蠻觴詠橫飛酒微一斗亦醉魏文有言當此之時忽不自知

其樂也繇今以思曠若星漢擬諸形容尚繪心目每當落帆江
汭擁衾無寐清角朝鴈游鴻夜吟我懷云勞不可說也自惟寡
薄豈辦任官此行邀福或叨一第思遂南歸寄迹丙舍將吾叔
仲長奉板輿對鵲占門徙魚築宅陸機之屋不閒乎東西何點
之山略分乎大小時及霜露言羅雞豚祀先之餘兼以速客雖
甌生塵而日晏風吹葦而歲寒而風詩敦睦取鹿食之相呼金
石歌商結鶉衣而不恥明明如月長照其素風溫溫恭人永垂
爲家法閉門養親至於沒齒雖三公上衮百城南面何以易此
哉其許我乎非敢望也有問訊者達此輒言音塵未積風雲逾
闊家食餘閑幸勛光采勞人草草筆不抒心

癸卯在南沙陳氏賓館有勸以遷教都會者因布家人書以周公之上聖日讀百篇以孔父之多能韋編三絕學者殖也不殖將落况庸虛如某者乎某非不知遷地爲良或可多出儋石然學子百輩終日卒卒豈復有須臾暇邪今孝廉船便冬杪復擬計偕萬一僥幸此身遂非已有爾時雖欲假片刻餘閑補平生所未及那可復得昔范希文以先憂後樂爲己任讀書長白寺垂十年晝鬻而餐斷齋而食雪案無寐燐敗葉自溫孫高陽作諸生授書關外年四十矣布衣徒步往來飛狐倒馬閒數從塞下老兵問阨塞險易士馬彊弱之數是二君子者伏則泥潛出則霆震發皇耳目驚爆天下非偶然也某雖無似志事豈後於古人是用辭富居貧使故業可理然且廣廈細旃綬冠坐

論供養過二公遠甚恐將來藉手不中與二公作廝養僕耳凡
此悽悽不足爲外人道也

抵山西寄兄弟書

隱石三兄宜城五弟鈔得鄉錄知吾弟疆臺又躡垂翅秋風悵
惋何如也雖然君子藏器於身俟時而動艱貞之志有待而行
究亦無所容心耳嚮者次琦罷耗廿年曾無一日之戚吾弟所
親見也匪曰冲襟獨遠亦見夫天下事苟非我所能自主憂焉
無益卽亦任之而已昨九月十五日在漢鎮上車擬取道汴梁
卒亦不果蓋次琦之繞行之汴也亦以睽違函丈垂近十年且
江甯公在晉日久可以慰謁恩門可以諮請地方所急耳而世
俗遂以爲持之有故竊從有相稱促在臨湘時夏憩亭太守迎
謂曰君到汴梁甚好貴師木君先生與新晉撫季公同鄉同年
素稱契密首府郭公亦潘公同年也得潘公爲君先容賢於十

部從事矣泊過湖北訪謁宦楚同鄉諸公議論與夏太守無異
或且羨師門得力嘖嘖稱歎者有之昔晉人欲加禮於王丞相
馮懷以問顏含含不答退而有憂色家人問之曰吾聞伐國不
問仁人曩者馮祖思問佞於我我豈有遺行與今茲之事次琦
不敢薄今人也惟愧省身克己根氣淺薄使別嫌明微之操未
能卒白於天下皆次琦之罪也君子立身行事當昭昭如日月
之明離離若星辰之行微特較然不欺其志而已安能隨波靡
犯笑侮招逆億以察察之躬爲當世所指目邪且卽不敢自作
身分而世旣未能免俗一槩以相量矣將或枋柄在手又安能
昌言正色直已而直人邪十一月初三日恭領部照十八日到
省廿三日稟到目下晉省人員冗濫候補知縣積至八十餘員

內卽用班亦多至十五 彼中人僉謂捐遇缺者多故各班俱歷
員未補連次琦在內 捐指省者眾故候補日繁積歷甚卽補缺難候補多故署事亦
不易大約署事總要年餘兩年補官則三四年不等然祇據目
下情形而論將來捐輸花樣無窮卽亦不能懸斷也并州之域
少燠多寒舟楫不通物產騰貴需次其閒器服薪水之資芻馬
僕賃之費居大不易總之

君父之身旣不敢自屏寬閑偷安於昕夕平生之學又不敢苟
圖微幸自隳其廉隅去留久暫之閒必稍需時日乃能自擇此
際政難臆決耳有訊予者爲我謝之一官萬里嵯峨太行身遠
目窮白雲何處家食餘閑幸勛光采已酉十二月十四日次琦
頓首

寄伯兄書

弟到晉以來涉厯吏事深知此事之難且暗悼邇來講究此事
之人之鮮人人以一官樣作官民生何賴焉又竊見邊方日賊
時事多故實不勝杞人滌室之憂恐將來謬當事任喪所懷來
故於武備倉儲河渠地利諸書不得不重加搜索有可借者無
不往借至無可借處猶出候補勉強之錢購之也次琦謹稟

答康述之書

弟晉中需次補缺尚無其期然自省庸虛正須閱歷卽稍稽時
日爲將來道處筐之誚固可以少安無躁耳兄知我者以爲何
如弟見住山西省城浙江會館館後室爲典守僧禪堂西偏屋
數間卽其出息弟賃居之出則徒步入則齋鹽作官是何物事
不過與和尚們隔壁耳昔魏敏果官京師時不攜眷屬王漁洋
尚書作戲詩嘲之云三閒無佛殿一個有毛僧弟今有佛勝環
翁遠矣一笑

答明同年書

珠江別裏握手無溫鱗羽既沈義望遂積願言之懷古人所唱
愛而不見如何如何接二月廿四日書知與南邨璞軒硯農共
賦北征羣雄振羽各吐鏗鏘前唱歸仁後廣賀世快慰何如也
足下外振國華內嚴庭誥屢采錯事正在此時興滅之云良所
未喻碧海四丈及愛之棠邨兩公就官有期暫作六月之息原
不爲過我家小阮往爲波臣所窘驚魂未定假歸殆亦人情社
中諸君子鄉書輒復報罷玉三獻而遭別博十擲而得隼才不
偶遇足堪於邑然得南邨璞軒爲吾黨吐氣駑負則墜趨蟲鳴
則蝻躍鬱鬱久居諸君子當不其然獨君族次卿溘隨運往竟
弱一个敕目將除潛舟遽悼悲夫悲夫無祿至此乎去秋聞耗

爲位以哭中間惘惘愴焉彌月自惟寡薄百不稱遂平生愉懌
乃在人倫歎去交親襄裏歧路易日曷月孤憤獨居繾綣良辰
則停觴靡樂倦言夙契則采葛憂吟猶復遘閔人琴慟傷哀樂
知己之言在耳泣瓊之淚盈懷他日逝水知歸會言近止過斛
斯之居聆山陽之笛朋酒滿目獨闕斯人能不憤結喉衿惻剝
肝肺也哉僕留滯晉陽抗塵走俗準之道素彌益慚顏此地人
員積薪之故足下應具知之仍歲勞忉家兄晚亭在都自皆詢
悉選人恆患每在憂貧厯相九州此邦爲甚僕往者家食屢空
鄰於殆庶今云釋褐代匱合於曩編東坡云獨有羈旅人天窮
無所逃僕之謂矣出接人事車馬如龍言笑掀赧發雲會宛
其入室無與爲驩燈火蕭然便同蘭若涼風振闥秋蟲鳴階聊

復循除咄咄自語參橫斗仄匏瓜在天恨然不覺遠道之增歎
繁憂之易入也雖然晉國亦仕國也君子之難仕伊古已然何
況今日莊生謂知其無可奈何而安之若命況其實有命者邪
安之而已足下得意留都看花多暇時復賜裁牋問敷衽論心
或嗤慕賢愚或銓衡雅俗旁及政術兼詳文藝藉以藻暢襟靈
蜀祛首疾於萬里之外獲一隅之益亦索居之一快也縈鬱旣
久芬響自殊洗光咸池擢秀蓬閭亦其理也諸君勉之矣欲言
千萬臨筆翳如報謁起居心泝何極

赴襄陵寄兄弟書

伯兄大人仲兄大人宜城老弟鈞喜次琦差旋反寓得宜城來
札家事種種曉悉一是來札云兄弟各人都已窮慣米薪麤給
支拙亦所不辭遠道加餐勿煩南顧至哉此言澹而彌旨非吾
兄弟守分敬身各安義命吾弟積年見道漸近自然何以有此
雄雉之詩聖者歎之矣真令厯碌勞薪軒渠一笑也次琦奉檄
訪緝郭志一案該犯旋在通州被獲此役便可銷差因續委查
辦關外事件以致留連六月十三日輪委到班於口外和林格
爾地方接署理汾州府孝義縣之檄星馳回省收拾起身廿七
日又奉委署平陽府襄陵縣告病遺缺兩缺長短優拙不甚相
懸更替之由具有緣故俟到家面陳然默驗平生事皆前定守

素之士愈知天命之有權而人謀之不能以豪髮參者卽此一事倍畏天明次琦於廿九年出山本鄉陳兆康兄送行詩中有孝義似君名易副詩書供我債難償之句羅蘿川侍郎亦有贈別詩末云平陽古帝都俗有堯民雍君來續干羽我將播笙鏞二詩見藏篋篋又可詢兩家而得數年之事萬里之遙何機關之示見乃爾邪然則人謀又何爲邪

此事竟可補入唐鍾輅前定錄中

見擬七

月十二日起程二十日接印卽天雨泥濘不能寬期數日祈代爲昭告祖宗父母俾在天之靈庶幾一慰且藉以默相顓愚使無隕越幸甚幸甚是地土沃民醇尚稱易治且水泉疏衍人物秀良有秔稻有蓮菱有魚鰕最近南中風景卸事大槩在冬臘之間無具之身初膺民社雖加勛勤慎未知將來能勝任否勉

之而已七月十一日次琦謹啟

答王萊友書

萊友先生閣下人來辱賜手函感悚無似重讀前翰知數月來
眷矚鄙人甚殷甚亟且復勤勤懇懇若許爲可與語可與道古
者然耆舊之推誠大賢之善誘固如是其無町畦也循誦再四
至於涕零僕少無宦情又不習吏事州縣之任非所克堪此出
蓋爲親知逼迫勉強一行待罪來襄奉職無狀瓜及便當棄去
進惟周任陳力之義退奉杜史止足之誡不如是固不可也自
惟寡薄童牙未萎猥已接跡通人恭承大雅中間浪跡若驟若
馳若謬若迷而終無所泊棲四十之年忽焉至矣誠甚愧誠甚
懼也思欲屏跡幽遐追平生所不逮古人已遠來者難誣歲月
侵尋未知果有成否先生超超出處行與道俱浹長晉城差堪

比匹末學仰之政如濱海蜚人持蠡飲渤不過取飲口腹而止
莫能測其際涯也大箸鄂宰四稟謹已登領譯述日新實事求
是尚冀源源寄讀開我見聞方今士習日離根柢倪薄不知伊
於胡底人材阨壞職此之由天不愁遺海內耆髦殫生翳然將
盡後生不見老成卽聾從昧將謂讀書學仕不過爾爾甚可悼
歎仰繼前良下覺來裔以續百年來經師之緒非先生而誰伏
惟願性齎勞爲道自愛欲言千萬紀綱遄發使平昔蓋闕之疑
未及貢諸左右獨恃厚愛吐罄肝鬲輒復頓盡惟矜其直不責
其狂愚幸甚幸甚壬子重九後十日琦頓首

又答王萊友書

萊友先生閣下別後刻欲走謁霽除飢承德範不意後政劉君延至二月上旬始行接篆卸署後又爲交代一節絮絮至今屑瑣凡猥最不堪爲長者告日來乃漸有成議一得蒞事便如脫鞵之鷹不復能羆羈此地矣僕南歸之議往復自決然江楚阻兵竟未卜戒塗何日意兩人繼見之緣蒼蒼者尚猶未靳故遲遲我行邪句讀鏤板一兩月想可告竣大箸中有未刻望分錄給若行篋攜有家集及鄉先正名集亦分數種出輯

國朝名臣言行錄所取資也此書成後尚欲仿黃梨洲明儒學案輯一書以著我

朝一代儒宗顧不欲分漢學宋學如江鄭堂師承記云也見聞

隘陋未知果有成否其例略容寫錄就正大約月終乃到山川
回湫我勞如何復啟不盡悽悽二月九日琦再拜

去襄陵後答王棻友書

棻友先生閣下歲月易得違侍遂已一年子子行路閒以兵荒
賤訊遂希同此邦域輒已如是異時東海南海津涉萬里其爲
契闊可勝道邪比奉五月十六日惠書勞問甚厚益用惶媿又
省知動靜多豫且浩然決引身之舉甚慰甚慰昔人所謂其出
也若雲其處也介于石恢恢乎自我訓信與道園方者也瞻佩
無任僕去夏反自襄陵卽以不才自棄申請往復歲盡乃獲給
咨而江楚兩路均已不可行矣中間曾肅手書具述歸里後當
仿溫公蜀公故事僭爲閣下謬傳以貽學者並陳屬草雌槐癭
賦僕遯寡韻尚須潤飾今承督促則知此簡未達籤櫛不審何
處洪喬竟爾沈置奈何平陽陷沒公私塗炭其爲酷毒如何可

言方春衙觀風日正繁冠纓之徒魚鱗雜集大守留髡送客接
栢舉觴竹肉紛流譚諧間作白日既匿繼以脂燭當斯之時都
市如故也士女如故也春容愉夷昌丰潤澤何圖數日之間陵
谷遷貿府主寅僚盛焉頓盡甚可痛哉以此忽忽恍若有亡加
以宿食東西車不絕輓轡轡稍休頗欲脩理故業而憂從中來
停簡輟毫感舊傷懷惓然流離誠不復能措意文字間矣近雖
栖尋舊宇譬如池魚籠鳥時有山藪江湖之思設秋後內地仍
不可通決意道津門航海歸矣幼安危坐巢父掉歌古之人有
行之者丈人聞此必謂生好勇過矣過矣哂之邪悲之邪大著
釋例補正益復精博無餘憾說文句讀刻成幸更覓便惠致世
難方殷靡知所底頂領之歎詩雅以嗟然竊惟自古泯棼之會

元黃戈馬之秋天命民彝必不可以一朝絕不絕則宜有所寄
寄斯鉅者宜在脩學好古之儒秦氏以還如伏勝申公許鄭二
劉熊安生之倫是也閤下勉旃自愛而已頃何以爲娛頗復有
所造述不僕旣不作河東之行無緣復詣大治悠悠之別道阻
且長知復何時更得一面能重奉臯比開吾觚牘不南望於邑
辭不敘心六月廿有八日琦再拜

答徐次功書

件來承惠教函驚聞賢郎紅蘭委露行道傷心弟緬邇關河有
疏奉慰悚仄何如捧誦明示謂旣已視事不得不忍痛辦公大
哉斯言令人欽服無地方今天步屯邇時艱孔棘政使居父母
之憂猶當墨纓視戎金革無避豈况兒女之私劉越石不爲一
兄富鄭公未嘗哭女純臣之誼烈士之胸與閣下而三矣區區
跳梁竟釀作門庭之寇時事如此可勝憤歎然韓侯嶺爲省城
第一重厄塞得閣下守之正如老罷臥道太原自可恃以無恐
昔傅修期上馬擊賊下馬作露布自言年六十九張東之年七
十舉賢良便建擎天之勳少陵云男兒功名遂亦在老大時閤
下勉之矣閣下辦理防堵軍資礮械一一齎備往後更可源源

接迨日來想籌畫有緒小醜未必能來萬一其來則我以逸待勞以主待客以險待夷以精銳待疲乏彼直來送死而已

復郭中丞書

某於月之二日接奉由縣專人發到賜書仰叨慈注捧函祇誦
光動里閭所以委曲而誘進之者至周極渥猶復導之以舊遊
之懽示之以式廬之雅雖盧毓之禮張珩主簿奉書信陵之迎
侯生市人增色以今況古光寵爲多聞命兢慙心顏罔播敬諭
大人體

國公忠受

天庥命勇惠於三山五嶺通道於九夷八蠻夙隸帡幪靡不喁
戴矧依譜未尤願趨風旌節甫臨卽擬晉瀆尊嚴貢誠左右病
軀偃蹇事阻從心伏念某海濱之鄙人也世守一經家徒四壁
疇昔苟圖祿仕亦有歲年遯尾蠹上豈伊素懷巢林鑿坏與之

殊轍屬以身嬰痼疾絲歷十載肝氣失調脾風頻動每遇顛發
涉旬逾序加以入秋痞作乍冰乍火昌黎譴瘧文字無靈潘岳
閒居聰明彌拙匪云離勞遠俗保其幽素聊欲蠲痼導和就成
省曠不交人事職此之由若謂膏肓泉石以爲名高其於乃心
翩其翻矣脫獲刀圭少效氣力稍充分卽鞠躬轅鈴轅恭承架訓
鈞論乃云當以小隊過訪深山此誠古大臣忘分下交之至懷
發潛顯幽之盛節也若某者文義不豐行能無算曾持吏版自
異幽貞大人任方國之重時事方殷日不暇給一旦勤大府之
高牙就空山之小草人聽惶惑衆論紛呶縱不疑大君子偏嗜
之奇必且重山中人虛聲之誚弗敢承也亦非所望也願垂意
而深察焉

又復郭中丞書

次琦於前月月晦接奉廿八日賜書渥叨垂注仰見大人虛已
念舊之殷有加無已下懷感激莫罄言宣伏讀頒到淺語十六
條鑄砥物情而肝膈迸露語語載隆人正俗之思以出陳承祚
所謂公誠之心形於文墨足以知其人之意理而有補於當世
者庶幾近之敬當與父老子弟誦服而訓行之也政成化光拭目
俟之爾而鈞諭猶以謂苦心焦思莫知所從則誠鉅人君子
欲然不自意之深衷也古大臣昭融契合功施而澤究名成而
道昌良亦發皇耳目矣而獨其殷憂寤歎之私時若有不釋然
者流示於語言文字之表何者魁閣之士慷慨豎立之才其許
身至伉而待物至厚其憂時至深而望治至迫天時人事或不

能驟副所期則鬱伊之感易作閒讀古人著作若高平涑水遺文暨近世王陽明盧九台諸公文集輒低徊想見之蓋非獨一世然也次琦少無學術長益迂愚不幸仕學無成又以病廢大人過聽浮虛獎稱高躅誠許與之意厚也而實事則竊未然昔孟陋見禮於桓公人謂陋學爲儒宗宜參府事公歎曰會稽王尚不能屈未敢擬議也陋聞之曰桓公正當以我不往故耳億兆之人無官者十居其九豈皆高士哉我自疾困不堪冀命耳非敢爲高也古人成言特符鄙事比益沈縣至乃不任拜起有孤延擐速戾何極瞻望崇轅踟躕而已伏惟含宏之度原其筋倪而不責其狂疏幸甚幸甚

與老爲謙書

爲謙足下良久不面比想讀禮興起慎攝爲慰僕前在鄉時得明君次卿書中及足下中間違言至欲離邊一事僕殊駭貽足下天性溫良湛深名理突有此事諒非無故而然雖然不可不善處也足下在鄉黨中雅負清望望之者衆卽求之者深况庸俗之情望風逐影方今尊堂棄養大婦持家而足下適有此舉形迹交關易滋多口卽喙長三尺誰能家至而戶說之語曰非常之原黎民所懼又曰君子防未然不處嫌疑間今至戚如次卿且不見諒况悠悠行路之人哉僕與足下情均骨肉人議足下是議我也聞此以來如芒刺在喉吐卻始快少年作事爽直境過時遷每留後悔晉書王獻之傳稱其遇疾家人上章禮神

法當首過問其有何得失對曰不覺餘事惟憶與郝家離昏獻
之前妻郝墨女也又陸放翁棄唐氏後終身歎惋所賦釵頭鳳
詞及沈氏小園諸詩屢訟其事至今讀者輒爲心惻賢達且然
何況我輩聊舉一二以見覆車知愛有年心腑相照必不以謹
謹取罪次琦頓首

答吳澄溥同年書

不見遂三十年一昨枉過高軒相視須臾都非疇昔爲之憮然
然此三十年中閣下謙論在

朝廷仁恩在毗庶蚤晚卿雲重麗高掌遠蹠建樹更無窮期以
視弟之學仕無成知難先退牛宮馬磨中爲鄉人沒齒其度越
可涯量邪辱書獎飾逾恆使寒窗偃蹇人不衣而暖適窗外有
霜菊數叢葉萼蚤梅一本對之展讀覺晚香幽韻同入襟懷快
何如也伏省莊居多豫風雨閉門日與古人相對尋見在可行
之樂補平生未讀之書甚矣閣下之嗜學也閣下自笑耽此是
平生痼習痼病也痼於書所謂不病病也昔伊川程子還自涪
州貌加豐腴門人問故程子曰力學之功也人不學便老而衰

每省斯言爲之惕息頃見閣下酒招譚笑雖辭氣雍容議論猶復英發袞袞千言夜分忘劬李延平涵養服人錢世儀精神滿腹殆兼有之與卅年前促膝三館時意興初無少異則是無故則能取求於學故東坡云嗟余老矣百事廢卻尋舊學心茫然弟輩坐擁皋比真令慙顏無地矣歲暮懷人往往增劇盼閣下春融再到情在於斯子貢言盟可尋也亦可寒也弟則謂盟可尋也不可寒也蓋望公如望歲矣敬書此以當息壤謹復大安惟鑒不盡

南朝人物如蔡興宗者較之同時諸人才識亦頗可稱述始終宋代亦無一身二姓之嫌惟其濡迹逆劬之朝受其太子中庶子之秩此李充所謂不及甯生之如愚伯玉之可卷者

也毀方喪節之誦夫復何辭來教斥爲五代馮道一流誠確
論也謹按魏晉以下理道不明恥尚失所常有號稱名臣智
勇超出而委贄累朝醜顏陳力者時論亦恬然不以爲怪顧
亭林日知錄正始兩段見卷十三趙甌北陔餘叢考六朝忠臣無
殉節者一段見卷十七言之最悉嗚呼此程朱講明性道之功所
以扶天綱立人紀追配孔孟而與天地無終極也閤下以爲
然乎

答求書者書

鄙人惡札自嫌罕嘗捉筆賢契所知也近益頽唐日滋媿鄙就以書法論堪與碧玉老人充廨養役平伏惟善辭免留笑柄卽愛人以德之事耳惟照不莊

答李鞠圃太守書

鞠圃先生公祖大人榮下福星指粵皓首黃童一盃額手稱慶
洵今人願天從也南交草木舊日皆知公名西漢循良此日樂
觀公治行繇一郡以暨一方繇一方以覃四遠杜子美所謂得
結輩十數公落落然參錯天下爲邦伯萬物吐氣天下人安可
待者也其爲殷祝可勝道邪方生回拜手書及燒春之賜恭悉
五馬過臨吉祥止止而弟竟不獲一叩行轅脩部民之敬禮失
則愆于心有忡矣弟自送別後都無好懷五月家弟不祿人倫
之戚不言可知涉秋以後困于瘍瘡臥閤十旬杖而後起小人
薄祐福過災生周易以消息盈虛爲天行物理自當如是自今
以往惟有退藏加密思日孜孜以畢餘年而已荏郡何時報政

時來不無公暇老眼未枯接栢舉觴尚能信眉一笑特未知天
假之緣否耳祇復恭賀大喜兼請勛安惟鑒不備治愚弟朱次
琦頓首

朱九江先生集卷七終

再傳弟子校栢於讀書草堂



朱九江先生集卷八

文

南海九江朱氏家譜序

譜牒之學史學也周官莫繫世辨昭穆掌於小史史記紀五帝
汜夏殷周秦並詳其子孫氏姓而世本一書漢志隸春秋家蓋
先王譜學之設實與宗法相維而表裏乎國史宗法立而士大
夫家收族合食至於百世不遷而奠其繫世辨其昭穆朝廷且
爲之庀官司藏冊府是故黃農虞夏之胄閭數千祀而可知也
世祿廢宗法亡譜學乃曠絕不可攷漢興天子奮於草茅將相
出於屠牧率罔知本系所由來魏晉至唐仕宦重門閥百家之
譜上於吏部維時官之選舉必稽簿狀家之昏姻必等門第而

譜學復興歐陽氏脩唐書有宰相世系之表隱示國史家牒相
爲表裏且謂世族之盛諸臣克脩家法致然跡其編纂論述若
郝前史所無然通人碩儒咸許其湛深古誼能探先王制作精
意蓋郝而實因也五季喪亂圖牒盡湮一二儒生乃欲掇拾補
苴冀存古宗法一綫及夸者爲之扳附華腴虛張勳伐或至不
可究詰譜錄一家遂爲識者厭薄而去史益遠矣吾族之有譜
也自明萬厯丁丑文學公學懋始也文學邇始祖勵七世當是
時也子姓服屬未遠恩義絲結風氣醇龐其仕者精白一心以
從王事而不有其家其父老教讓教謙敦長者之行其子弟以
讀以耕鮮諺誕之失卽一二宦裔貴游徙宅省垣號稱豪宕然
日散千金親故多待以舉火一時數搢紳家法以吾族爲優微

特家桀之先立也厥後一脩於處士公昌瑤在

國朝康熙丙申康熙以來無踵事者道光丁未次琦歸自京師之官山右父老祖予酒次及之異聲同歎咸豐初元亟加討論以寇亂中輟亂已次琦亦假還共申前議於是宗人朝議大夫奎元兄弟慨然願任脯牘剗之費乃會推吾弟明經宗琦主稟而宗人上舍士仁士報景熙佐之次琦不揣驕昧斟酌今古成序例一篇授以從事是役也寘局於己未之春斷限於辛酉之臘以今年正月鐫竣刊易再三編摩况瘁厯十一寒暑而書成實費白金二千三百兩有奇夫然後十有二卷之書繫世之源流昭穆之近遠恩榮之覃被祠廟之宗禋墳瘞之阡原菟文之津逮燉惡之登削遺軼之甄尋直而不汙信而有徵不侈前

人勿廢後觀敢云美備要其規模亦略具矣次琦行四方久竊慨風俗日益以敝而親情日益衰不啻漢史所稱斗粟尺布而骨肉不相容者朝議兄弟獨能推鉅貲不色吝近又增寘祠嘗捐白金三千兩而宗人翰林待詔銜國恩亦捐千兩其諸義重千鈞利輕一羽者與於以見吾先人之遺澤長也詩不云乎戚戚兄弟莫遠具邇又曰豈無它人不如我同姓自茲以往願我族眾咸喻於古者宗譜相維遺意而使內外有別長幼親疏有序有無相調吉凶患難相恤賸臘祭饗飲食相周旋毋以財失義毋以忿廢親則吾家世德作求安見不如浦江鄭氏江州陳氏諸義門書之國史以爲美譚者宰相世系表序曰門祚之盛衰雖視功德厚薄亦在其子孫烏虜可不勗哉可不勗哉

南海九江朱氏家譜序例

古者譜系之書天子曰帝繫諸侯曰世本

周禮小史疏

而通上下而

言均謂之譜桓譚謂太史公作世表竝倣周譜是也

梁書劉魏

晉代降初曰某氏譜

世說劉孝標注引王氏謝氏吳氏孔氏諸譜止稱某氏譜又屢引王氏譜獨王倫一

條稱王氏家譜紀尚

書疑家字爲羨文後曰某氏家譜唐書藝文志有謝氏呂氏

譜

又有別撰稱名者如摯氏世本

世說

裴氏家牒

裴守真撰劉氏

家史

劉子元撰

范陽家志之類

盧藏用撰以文心雕龍曰譜者普也

上俱見唐志

注序世統事資周普則譜迺紀世之正名古所命也故不從其

異也繫以其地稱南海九江志別也有同姓而異望同壤而異

族者也趙郡東祖李氏家譜

唐志

四明槎湖張氏族譜

國史經籍志

其例也

有序名譜之例

朱九江先生集

文

譜以合宗且有世系支派然後諸譜中諱字有可稽昭穆有可

考故首列宗支譜鄭漁仲謂三代之後氏族合而爲一則以地

望明貴賤使貴有常尊賤有等威

通志氏族略

漢有鄧氏官譜隋志唐

有衣冠譜又有官族傳

唐志

氏族書第門閥有自來矣故恩榮譜

次之譜所以明孝愛作一本之思也故祠宇譜墳塋譜次之譜

所以守文獻備一家之故也故藝文譜家傳譜次之其餘遺聞

逸事不列於諸譜者散碎爬羅亦述家風脩世錄者所不廢

潘岳

有述家風詩明故以雜錄譜終之也

右序分編之例

古人自序如屈子離騷馬班二史罔不上溯姓原譜牒亦然

見漢

書揚雄傳注引揚雄自敘

唐書宰相世系表廬陵歐陽氏譜老

譜牒世說注引溫氏譜序

宋蘇氏譜竝沿其例迺古法也宋朱長文朱氏世譜

終雲樓書目述古堂

書明朱右邾子世家明史藝文志今固未見然姓族源流不可不考

也近時諸城劉氏譜景城紀氏譜均譜必有圖列行邪上周譜

例也傳劉杏後漢書盧植傳所謂同宗相後披圖按牒以次可知

也通志略有錢氏慶系譜復有錢氏慶系圖國史經籍志有仙

甫自作歸氏世圖必分房唐書世系表例也始祖下定著三房

不曰門通志略有崔不曰派越錢氏分派略不曰眷不曰枝

唐表裴氏分西眷中眷東眷陸氏僻也故仍稱駟觀房存著房

分魚析枝丹徒枝太尉枝侍郎枝

繹思房也圖以四世爲一部服窮於四世也膠州法坤宏撰法氏譜以四世爲一

部謂服窮於四世格盡別起者重書一世明有所承也歐陽氏譜詢書

譜之首二圖皆書名臨文不諱也蘇氏譜於祖父之名加諱字歐

陽氏譜從其同譜者今從歐譜一族之公非一人之私也名記

原名更名一名別微使後有考也

唐書世系表宗室表載初名

氏表遂一名從鄭氏表記一名綺

名闕者唐表易稱某

宗室表富陽令某柳氏表某朔方營田副使

今代以方空古義也逸周書穆天子傳闕字代以方空也名後

書字與爵古譜類然也

見世說注引諸家譜

雖別字亦載也

見後漢書無虞謂傳注無

爵者魏氏譜稱處士

世說注引魏氏譜曰顓字長齊祖允處士又引陸士衡薦戴若思表曰伏見處士沛

國戴淵盜賊亦稱處士不可從

今不從惡飾也漢代碑陰民與處士別也蘇氏

譜注不仕今不注無庸注也妻前後娶必書妾亦書正家也庶

子不書所生母統於嫡也異出之子不分書統於父也

景城紀氏譜之

例立繼者所生所後必互書責為人後且不替本生也

湯敬升族譜議

之居址必書聚族也

唐表居成紀居解縣洗馬川之例

僑它境必書重出疆也

唐表徙河中徙聞喜之例

異姓抱養削不書干犯刑辟削不書棄親出家削

不書防亂宗也

膠州法氏譜之例

若夫支派失傳者附書荀氏家傳例

也

世說注引荀氏家傳曰巨伯漢桓帝時人也亦出潁川未詳其始末

故登閣嘴房列於譜也後

裔無考者附書七房鄭氏表例也

唐表七房鄭氏大房白麟故後絕第三房叔夜後無聞

世絕無屬列於譜也附居址圖從類也

右序宗支譜之例

唐許敬宗李義府等奏請刪定氏族志以仕唐官五品以上皆

升士流於是兵卒以軍功進者亦得入搢紳嗤之號爲勳格

唐書

許敬宗以貞觀所定氏族志不載武后本是知氏族重清門不

望李義府亦以其先世不見敘更奏刪正

徒侈膏梁華腴也 郡姓中三世有三公者曰膏 然世說注歷引

諸家譜凡著錄之人靡不詳其起家歷官者卽舉孝廉不行亦

具於牒

王倫一條注引王氏家譜曰倫字太冲司空穆侯中子司徒渾弟也年二十餘舉孝廉不行

而唐史

括氏族書爲世系表則凡中外顯僚降至簿尉執仗挽郎無弗

具載其階資則自孝廉有道及第明經以逮陪位出身吏部常
選兵部常選胥錄焉可知有一官者無弗書官有一資者無弗
書資正古法也故都錄之爲恩榮譜也若夫制詔聖書古錫命
體也旌節孝旌耆壽古表宅制也是恩榮之鉅者故以起訖斯
篇也

右序恩榮
譜之例

世守祠墓孝子孝孫之心也然晉博士傅純議曰冢槨以藏形
而事之以凶廟祧以安神而奉之以吉送形而往迎精而還此
廟墓之大分形神之異制祭者求神之道至多而獨不祭墓

晉書

東海王
越傳

固知祠墓有先後也朱子家禮謂古之廟制不見於經

且今士庶之賤亦有所不得爲者當先立祠堂今考祠堂之稱

名義最古

王逸序楚辭天問篇云屈原見楚先王之廟及公卿
祠堂畫天地山川神靈奇詭之狀因書而呵問之據

此則祠堂蓋起於周代

我家祖祠建於明嘉靖時當夏言奏請士庶得通

祀始祖之後

見王圻續文獻通考

蓋非直無借古經正善承朝廷德意爲

之江陰楊尚書名時曰祀始祖則族有所統足與譜系相維然則祠廟譜系義相成也附以坊表第宅園亭樓閣之屬禮營宮室宗廟爲先居室爲後序也

右序祠宇譜之例

記云大夫士去國曰奈何去墳墓宗子出疆則庶子望墓而祭

古人重墓故墓亦載於譜

隋志有楊氏家譜狀并墓記一卷譜元戴表亦有小方門戴氏居葬記譜

塋墓非邦也紀氏譜竝仿金石例爲圖

潘昂霄金石例引古金石例云墓圖作方石碑

先畫墓圖有作員象者內畫墓樣各標其穴某

人其石嵌之祭堂壁上無祭堂則嵌於圍牆上

今不從族蕃不勝圖也圖以嵌諸墓非以撫諸譜也譜墓用羅經甲乙分正隅非徇形家言辨方也子謂防墓不可以不識辨方所以識也

右序

墳塋譜
之例

裴氏家傳曰榮字榮期河東人撰語林數卷號曰裴子

世說是注

爲家牒詳著述之始今載著述區分四部存佚俱收隋唐二志
例也隋志注亡篇唐志不復識別明焦竑志國史經籍從唐書
注者紀其實不注者昭其慎也今亦不復注也標目後揭原書
序跋文獻通考例也或附臨評亦通考例通考又本之晁氏郡
齋讀書志陳氏直齋書錄解題也

右序藝文譜之例

有家譜有家傳魏晉間各自爲書

世說注有李氏譜又有李氏家傳有袁氏譜又有袁氏家

傳有王氏譜又有王氏世家傳隋唐兩志家傳入譜家譜入譜系惟舊唐書經籍志合爲一類

然唐志譜系

類有官族傳有孔子系葉傳則傳亦譜也傳稱世傳按世爲傳
據范汪范氏世傳文也序述之文歐陽氏蘇氏皆名蘇氏乃至

名祖父

族譜後錄稱吾祖某吾父序

今不從惡斥也禮子孫得稱祖父字也

儀禮祔祭之祝曰適爾皇祖某甫以濟附爾孫某甫是也

又周公稱

其祖曰王季屈原稱其考曰伯庸

曰某公據白香山家狀柳子厚叔父墓版文

也其無官者亦稱公據吳仲山碑文也

漢故民吳仲山碑稱吳公仲山洪适謂故民者

物故之民也見隸釋

婦必繫某公配妻以夫為綱即以夫為名也傳稱武

王邑姜史稱周公阿杜是也

左傳昭元年當武王邑姜方震大叔南齊書周盤龍傳盤龍愛妾杜

氏上送金釵鐲二十枚手敕曰餉周公阿杜

歐陽氏譜亦曰睦夫人欽夫人也有封

者稱封無封者通曰安人從時稱亦沿語類稱夫人例也

朱子語類

無爵者曰府君夫人漢人碑已有只是尊神之辭

曰原配據晉書禮志文也

禮志前妻曰原配

曰繼配據王介甫葛源墓志文介甫又據儀禮也

儀禮喪服傳繼母之配父

不曰繼室古之繼室非妻也

說詳左傳隱元年杜氏注及孔氏正義

不曰中娶中娶

見世說注不曰次配將軍李公墓志皆僻也婦詳祖父族里

竝及親串世說注引諸姓譜類然碩人首章之義也傳中年壽

可考必書卒年可考必書史家例亦譜系法也世說注引周氏譜曰翼年六十

四卒三國志管甯傳注引先賢行狀女可紀者未嫁已嫁內外

曰王烈以建安二十三年寢疾而終得並書唐志王方慶王氏女記例也在室者章女美出適者爲

家榮也傳中事行要在不誣湯氏所謂弗錄有善錄而冒皆不

敢也族譜傳末必注所據書示信也遠法歐氏百越先賢志近

本阮氏國史儒林傳彙也右序家傳

錢易記吳越世家事蹟撰錢氏家話一卷通志藝文略胡元吉記其

家世遺事著桐陰舊話十卷國史經籍志所謂數典不忘也或資誦

法或系掌故或備譚諧括之曰雜錄以唐志孔至姓氏雜錄名

之也右序雜錄
譜之例

歐蘇二譜以其所及知者列爲譜圖其疏遠者不紀蘇氏止錄本支四世而合族人各自爲譜謂各詳其宗合之則至於無窮夫惟族人不知爲譜故仁人孝子慨然思作譜以合之而又合其自爲族不仍歸於散乎歸氏有光謂爲譜者載其族之世次名諱其所不可知者無如何其可知者無不載也王氏元啟曰既舉族而謀之爲之譜以合之大體自當畢載無間於遠近親疏今不從存收族之遺也

史兼勸懲美惡竝書譜言勸不言懲故稱美不稱惡春秋爲親者諱厚之至也唐表於張氏上官氏世系美惡不諱張氏世系稱通儒仕安祿山上官氏世系稱漢右將軍安陽侯桀生安車騎將軍桑樂侯以反伏誅今不從不欲以先人媿子孫也婦改適舊譜皆書庶氏之母孔門不諱經義也晉王氏

譜並離昏不諱也

世說注引王氏譜曰獻之娶高平郗曇女名道茂後離昏

今不從隱夫凱

風孝子抱無言之恫者也

儒者泥於古經動謂大宗無子則立後小宗無子則不立後無

後者古有從祖祔食之禮

明儒田汝成羅虞臣柴紹炳汪琬徐乾學俱據此立論

新

會湯氏高安朱氏之爲譜且斷斷爭之以謂夫人皆爲立後不

協於古

湯敬升族譜議朱軾族譜解惑

是惡知古者大宗諸侯世國卿大夫世

祿宗人莫不恃以收族合食是以百世不遷今則井田世祿之

制絕而宗法廢人人可以爲卿大夫則人人可以爲別子之祖

禮記大傳別子爲祖繼別爲宗注別子謂公子若始來在此國

者後世以爲祖也繼別謂別子之世適也族人尊之謂之大宗

陳氏祥道曰諸侯之適子孫則繼世爲君而支子之爲卿大夫

者謂之別子有自它國而來於此者亦謂之別子有起自民庶

而致位卿大夫亦從別子之義此三者各立宗而爲大宗所謂

繼別者也陳氏譜曰別子有三一是諸侯適子之弟別於正室

一是異姓公子來自它國別於本國不來者二是庶姓之起於是邦爲卿大夫而別於不仕者皆稱別子也爲祖者別與後世爲始別子未必非支庶也而謂支庶不立後可乎而況小宗乎宗法既廢所謂世適而號爲宗子者或貧且賤無廟與祭彼小宗支庶之無後者祔於何所食於何人何以使之有所歸而不爲厲乎金匱秦尚書蕙田著論非之是也

詳見五禮通考今不從禮貴

從宜亦以義起也

自廬陵歐陽氏爲譜本出於渤海而必兼載千桑之族眉山蘇氏本出於眉州刺史味道而必兼載趙郡扶風河南河內之蘇爾後爲譜者往往兼及它郡之賢以著族姓人才之盛歸氏有光爲夏氏世譜黃氏宗義爲黃氏世錄則雖其並時而異派者亦列之

歸熙甫爲夏太常祖作世譜錄夏元吉湘陰人輔相五朝蓋與太常並時而異派者黃梨洲自爲世錄雜記先

世行事之可考者及它處黃氏之賢者如石齋黃其尤異者馮道周漳浦人與其父御史尊素並時亦載於錄氏元颺爲馮氏譜四篇其第三篇臚列異姓戚鄰諸顯人以表門閥今皆不從惡扳附之嫌也

朱子注論語孟子正文遇國諱則缺筆而不改字注則無弗避者其注易亦然錢氏十駕齋養新錄云見趙順孫四書纂疏及吳革所刊易本義班班可考洪氏隸

釋謂漢人作文不避國諱樊毅碑命守斯邦劉熊碑來臻我邦之類未嘗爲高祖諱也石經邦君爲兩君之好與何必去父母之邦皆書邦作國疑漢人所傳如此不爲避諱而然謹按洪氏之說非也石經奉詔刊樹鴻都門豈樊毅等私碑可比馬班二史及漢人著作多避邦字卽所引述論語文亦然如夫子至於邦百年一言而喪邦雖蠻貊之邦懷其寶而迷其邦邦善人爲危邦不入在邦必聞邦有道不廢邦有道則知邦有道貧且賤

焉邦有道穀之類多改邦爲國譜中凡遇應行改寫應行缺筆使石經全文尚存其悉避可知

等字俱欽遵

累朝聖旨所有新刊書籍照頒行恭避字

應行改寫應行缺筆字樣詳載欽定科場條例

欽定學政全書

雖易舊譜

樣書寫之論

無嫌也所以嚴功令也又順治七年以前廣中用故明隆

武永厯年號伏讀

御批通鑑輯覽唐桂二王年號欽奉

革除故譜中記載但書唐王桂王某年不復題其年號雖易舊

譜無嫌也亦以嚴

功令也

譜中文字或前後異文未歸一律蓋徵引異書采訪異手參差

錯出亦事勢使然日知錄曰五經文字不同者多矣更有一經

之中而自不同者如桑甚見於衛詩而魯則爲黽鬯弓著於鄭

風而秦則爲𦵏左氏一書其錄楚也遠氏或爲蔦氏箴尹或爲

鍼尹今按同一語助而書之粵若曰若先後攸殊同一人名而
由猶或惑雜書凡若此類不可枚舉至說文一書引用尤多錯
出如易以往客又作以往選爲的類又作爲酌類重門擊柝又
作重門擊槩書鳥獸韉毛又作鳥獸腹毛方鳩作重功又作若
屏功功有粵拊詩桃之扶扶又作桃之模模江之永矣又作江
之秉矣江有記又作江有涯靜女其姝又作靜女其娒擊鼓其
鐙又作擊鼓其鑿是製糾也又作是泄糾也衣錦褰衣又作衣
錦綵衣又作擊鼓其鑿是製糾也又作是泄糾也衣錦褰衣又作衣
驪馬又作疹疹駱馬不敢不蹄又作不蹄不敢不蹇又作
作瓶之室矣無然詭詭又作無然咄咄然則經典流傳亦
夷春秋傳忼歲而歎日又作翫歲而愒日論然則經典流傳亦
語色幸如也又作色艷如也更不可枚舉

非一律也故未之改也

書序在後古例也周易序卦與詩書之序舊俱列篇第中而退

居於策末

序卦移於李鼎祚書序移於偽孔傳詩序移於毛萇今惟序卦復其舊

周秦兩漢書籍

如莊子天下篇史記自序淮南子要略越絕書敘外傳記潛夫

論敘錄鹽鐵論大論文心雕龍序志篇皆同斯例漢書之序傳
華陽國志之序志後語大序後復有小序也隋唐以後序文始
列篇首又小目列上大名列下亦古例也禮記曲禮上第一疏引呂靖曰既題曲禮
於上故著禮記於下此古本大名又謂之大題陸氏德明云毛
小目列上大名列下之證詩故大題在下馬融盧植鄭元注禮記並大題在下班固漢書
陳壽三國志亦然詳經典釋文唐刻石經皆大題在下如詩經卷首
周南詁訓傳第一列於上毛詩二字列於行下所謂大題在下
也宋元以來刻本皆移大題於上而古式遂亡紀尚書昀云陸游南唐書尚繇
古式語見錢曾讀書敏求記幾少詹大昕云余曾見宋淮南轉運司監刻大字本史記亦大題在下然二者於書
無關宏旨也姑從時式亦可也右序全譜沿革從違之例

朱氏傳芳集凡例

一古者著書罕標義例自漢有春秋釋例

公羊微士
穎容撰

魏有周易

略例

王弼撰

始以例言至杜預序其春秋經傳集解謂經之

條貫必出於傳傳之義例總歸於凡遂有發凡舉例之說
書標凡例此爲權輿迺者家集編摩何關著述而抗希微
尚竊有別裁約貢數端用鐫首簡

一古人文字不以集名漢志載賦頌歌詩一百家皆不曰集晉

分四部

荀勗撰

四曰丁部宋作七志

王儉撰

三曰文翰志亦未

以集名也文集題稱始見梁阮孝緒七錄隋書經籍志以
謂別集之名漢東京所刪屬文之士日眾後之君子欲觀
其體勢而見其心靈故別聚焉名之爲集然則古所謂集

迺後人聚集前人所作非作者自稱為集也今薈萃家言
正符斯指猥名曰集諒非僞言

一書目集部有別集有總集其總集有總當世之集有總一家

之集總錄當世者始於文章流別

晉摯虞撰

後來集苑

謝混撰

集

林

劉義慶撰

其流也李善所謂舉中葉之辭林酌前脩之筆海

是也總錄一家者著於廖氏家集

唐廖光圖撰

後來王氏文獻

錄王氏褒肇宣化譯

陳氏義溪世橐

錄陳氏周振振其

希旦曷杲諸人作

類也陸機所謂詠世德之駿烈誦先人之清芬是也是編

專輯上沙朱氏著作聊便遺懷匪云縣國揚推古今銓衡

雅俗夫豈敢然

一古人文集祇以名氏命篇南朝張融加美號

融有玉海集十卷金波集

六十而總集之玉臺珠英仿之徐陵有玉臺新詠崔融有珠英學士集其在

家集則李氏花萼集李又尚賀氏聯珠集賀羣常謝氏蘭

玉集宋汪聞集謝安等十六人作咸緣義錫名者也若夫傳芳之集編

自洛陽相君錢惟簡輯祖父以下傳芳之錄定於金華學

士宋廣哀集家文名曰宋氏傳芳錄不揣舛陋濫與同稱猶之解詁繫傳

罔避雷同會要蒙求弗嫌數見思存竊比擬媿非倫

一劉勰文心明詩先列昭明文選備錄詩歌蓋詩即文也爾後

文粹文鑑諸書唐文粹姚鉉撰聖宋文鑑呂祖謙撰稟承靡異但姚氏惟取

古風真德秀文呂氏兼遶近體同源各委稍別衡裁竊謂

五言七言造端三百劉勰謂五言召南行露已肇半章孔穎達謂七言如彼築室于道謀是其

始排比聲韻具體梁陳陽湖趙氏謂陰鏗安樂宮新宮實壯哉雲裏望樓臺一首竟是律體

謂唐律不與漢魏同風則漢魏亦未與風騷合派徑塗日
闢運會攸開觀其會通理無偏廢

一昌黎古文尊曰起衰王楊時體亦云不廢曰駢曰散兩藝分
馳全椒吳氏謂一奇一偶數相生而相成尚質尚文道日
衍而日盛陽谷幽都之名古史工於屬對觀閱受侮之句
葩經已有儷言道其緣起略見源流治流似分叩源卽合
所謂古文若膚不如駢體駢體有氣卽是古文信也蕭選
渾合不分於義爲古謹循往躅不復分門

一程試之文是稱帖括昔人總集閒亦兼收英華采取律賦極

多

文苑英華李昉宋白等編

文鑑亦登經義數首其專書別見者則唐

志之宋元嘉策通志之賦苑

徐錯所集律賦

文獻通考之宏辭總

類陸時指南論

前時文擢犀策擢象策

元祐至紹興科皆舉場屋之文

專書也風簷所限畧刻成文寘列藝林不無軒輊是集概不麀人別錄以行

一選家棄取古有微詮呂氏編宋文鑑朱子謂其有取於文理佳者有文雖不佳而事理可取者有文理且如此而眾人久以爲佳者有文理不甚佳而人賢名微恐其湮沒亦編一二者水心葉氏謂其鉅家鴻筆以浮淺受黜稀名短句以幽遠見收近世朱彝尊輯明詩綜或以詩傳人或以人傳詩大指在崇正抑邪與一代國史相表裏茲編錄止一家無斯干系然原集具存爰施決擇零篇散落必與甄尋固云手澤念先蓋亦匠心師古

一我上沙始祖

諱子

爲元時處士明興不仕以終厥後儒學踈

興盛於嶺表自嘉隆以迄啟禎幾如王筠所言明德重光

人人有集省邑志乘所著錄名家總集所選掄可考而知

也不幸明季省垣之變湖州公府第淪沒

諱謨有承德第在會垣大市街

五德

觀側篇籍多湮而侍郎學博兩公舉義於鄉

侍郎諱實蓮國朝

諱烈懲舉義師殉難詳明史列傳

欽定勝朝殉節諸臣錄

御批通鑑輯覽唐桂二王本末及各志書學博諱名

臣官高明訓導殉身殲家踰宗族竄亡累傳文獻半就零

落雖其間瓌璋絕特之作亦自歷劫不磨然已存什一於

千百矣可歎也今輒網羅存佚與國朝以來之彙存者

校錄於編其有續收茲登後集

一揚厲宗功光宣嗣德烜赫鴻懿多賴文字以傳薈合成書最

徵傳守隋志有太原王氏家碑誄頌讚銘集二十六卷是

其先聲後世風流彌劬好事益多投贈則有朝彥過顧况

宅詩編名臣贊种隱君書啟錄

种符諸賢與种放書牘

艇齋師友尺

牘

南豐曾季狸師友書簡其子維輯

餞送則有賀監歸鄉集白監歸東都

詩哀弔則有考德集

強至輯韓琦墓後祭文挽詩

蘇明允哀挽壽言則

有世綵集

政和中廖剛曾祖母享年最高俱及見五世孫剛作世綵堂奉之人爲賦詩

靡不

琅琅炳炳炤耀來茲它如士大夫篇詠唱酬出風入雅若

漢上題襟松陵唱和諸冊又不勝數矣式衷古誼略與揆

求都爲外集

一德施文選不錄生存孝穆玉臺並登見在寶常謂文選以何

遜在世不錄其文其人既往然後其文克定故所擡拾皆

前人作也謹按論人以蓋棺而允譚藝亦以沒世而公去
噉名學士之譏譏就公是先生之筆削勿矜譁世遂議藏
山竊以不登見在爲正其存歿之例正集以作者爲斷外
集以所爲作者爲斷

朱氏捐產贍族斟酌范氏義莊章程損益變通規條

一完 國課各家義捐產業每年應納地丁正耗銀兩管事人務要埽數清完毋得分毫拖欠

一增祠祀祖祠向例每歲孟春舉行春祭祭畢族內子孫同堂合食以餽祖宗之餘頗有合於國語士庶人歲惟一祀之義其墓祭則祭畢闔族子孫各領胙肉一分惟程子謂冬至祭始祖一陽之始依其類而祭之人人皆宜自勉今擬添冬至合祭族內子孫皆令到祠隨班行禮祭畢照墓祭例各領胙肉一分其支發銀兩依牲牢時價低昂不爲拘限

一優耆老每年冬月頒給冬衣度歲銀兩七十以上每人給銀一兩四錢八十以上二兩一錢九十以上二兩八錢及百歲

每年給銀七兩其豐饒不願收領者聽又頒喪事銀兩七十以上每人給銀一兩四錢八十以上二兩一錢九十以上二兩八錢及百歲給銀七兩其豐饒不願收領者聽

一端蒙養每年四仲月舉行倍經之會於祠堂許族內學童年十五以下端重樸醕者執經求試仿唐書選舉志以禮記左傳爲大經詩周禮儀禮爾雅爲中經易書公羊傳穀梁傳爲小經各長老認真面試以倍誦如流默寫不誤者爲合式大經賞銀七錢中經三錢五分小經一錢八分以此經領賞者本年之內不許復執此經求試能通倍五經每經給賞外另加獎銀一兩四錢通倍七經二兩一錢通倍十三經三兩五錢其佻達頑劣者經雖熟記過不賞

一敎成材族設家塾每年敦迎甲乙科中學行兼備者爲師其有素孚士論畜道德而能文章則不以科第論脩金銀二百兩膳金銀四十兩贄儀節儀迎送夫馬銀二十兩令子弟受業其中月課獎賞隨時散給或有茂才異等覃精經史博通掌故講求吏治脩述辭章仍仿照阮文達公詒經精舍學海堂事例厚給膏火以示優異其不脩士行貽玷門風者攢出塾塾中購置書籍用資見聞應給銀數臨時酌量不爲拘限一廣登進祖祠獎勵子孫赴考應官卷資路費皆有成例捐項下擬加子弟應試銀縣考七錢府考七錢院考七錢生員歲科考加銀一兩四錢貢監生員報考遺才加銀一兩四錢生員考拔考優加銀二兩一錢貢監生員大比入場加銀二兩

八錢拔貢優貢 廷試加銀一十五兩舉人會試加銀二十兩舉人大挑一等赴官加銀三十兩進士卽用赴官加銀四十兩部曹中書回京候補加銀五十兩庶吉士回京散館加銀六十兩榜探回京供職加銀七十兩翰撰回京供職加銀八十兩其銀皆屆期支給不得探支若銀經支領赴試者無故而不入場應官者無故而不進京到省領去之銀照數追還

一恤惇嫠族內孀婦有無子無孫阨窮堪憫每年冬月給冬衣度歲銀一兩四錢係老疾顛連不能自食給銀二兩一錢若遇饑年族中義倉按名賑濟該孀婦領賑外應得之銀照常支給

一收孤露族內孩稚男女父母雙亡朋功親屬無力收養者管
事人查明告知族長紳耆酌量體恤無令失所

一施棺槨族中男女亡故委係無力買棺有待鄰里攤合者管
事人查明給棺銀七錢十五以下給銀五錢十歲以下給銀
三錢四歲以下不給已殮埋者不補給

一施墳地捐產項下置義地一邱編列字號號容一棺不許寬
占族中男女亡故委係無力買地有待鄰里攤合者管事人
查明給地一號安葬屍柩久停親屬零落將至暴露者給地
一號安葬棺已歸土圖遷義地不給小口不給

一籌意外捐產項下所有田畝基塘及城鄉鋪舍儻遇水火之
厄租息減成其年應行支撥各數目卽照見年收得成數折

算支發如收租三四成五六成七八九成管事人將有成數無成數各租息通盤打算看得若干成卽以若干成支放無庸勉強補苴其收受者毋得以常年定額取盈致貽舉債虧產之累各安所遇勿替遠猷

一留推廣族屬日繁男婦約計五六千口若仿義莊事例口日給米一升歲給絹一匹夫豈易言特各家捐出置產實銀尚多將來產業陸續增置租息亦陸續增加瞻族事例原可踵義莊往躅日推日廣彼江州陳氏浦江鄭氏通財世世號爲義門族鮮單寒芬流史冊亦事在人爲耳

一防虧空族分三房祠嘗分房輪管每年值理到班預於上年十月責成該房紳耆將人名舉出接辦後或有侵吞虧空情弊責在該房賠補今捐產出入數目亦交本祠見年值班帶

管不另選擇賢能議定租銀一兩抽出三分爲管事人酬勞
酬勞之外不許分文挪借儻有侵吞虧空責在該房賠補與
祠嘗同

一建義倉族繁人眾現存義倉資本無多尚須子母相權厚集
其力將來遭荒放賑賑銀賑米賑粥臨事將情形察看擇善
而從若夫差別極貧次貧省視大口小口防其擁擠披其顛
踣閑其男女藥其厲疫熟思審處事有萬端總期痛癢相關
使血屬周親不淪浩劫而已

一勸族居周禮大司徒以本族安萬民一曰媾宮室二曰族墳
墓鄭君注同宗者生相近死相逼也孟子井地之議亦云死
徙無出鄉出入相友守望相助古人勸親親固如是也義莊

規條身不住平江府者米絹錢皆不給今恪遵前典凡不在
九江堡居住者一切頒給均不許引族誼分霑惟擢科第者
膺仕宦者謁祖旋鄉則不應遐棄蓋策名 清時爲宗族交
遊光寵仰體祖宗之心尚顧而樂之耳

脩條例天下無不做之法亦無不變之法考范文正公集義

莊規矩文正創舉以後奏請御批者再

英宗治平元年范純
仁甯宗嘉定三年范

之指揮脩定者十有二自文正至之柔凡五世自英宗甲辰

至甯宗庚午凡百四十七年嘉定以來至於今指揮脩定者
又不知凡幾而義莊猶巋然屹然赫赫若前日事遙遙華胄
食德如新薄海訓行人無異望固由明德之遠其世守有人
維持不墜有足多焉易曰物窮則變變則通通則久今之條

例後日有任維持脩定之責如范氏後人之繼美希文者予
日望之

朱九江先生集卷八終

再傳弟子校葉於讀書草堂